

Inatsisissatut siunnersuummut nassuiaatit

Nassuiaatit nalinginnaasut**1. Aallaqqaasiut**

Siunnersuut inatsisissatut siunnersuutip, ilaatigut atuutsitsilernissamut aalajangersakkat allannguuteqartinneqarnissaannik imaqartup, ilaatigullu pigisat tigussaasut aatsitassarsiornermi aningaasaateqarfiup isertitassanut tunngavigisaanni ilaatinneqartassanngitsut aalajangersaaviusup, ilaatut 2014-imi upernaakkut ataatsimiinnermi saqqummiunneqaqqaarpoq aammalu siullermeerneqarluni. Inatsisissatut siunnersuut manna taamaallaat atuutsitsilernissamut aalajangersakkanik allannguuteqartitsinermit tunngassuteqarpoq.

Kisiannili atuutsitsilernissamut aalajangersakkani allannguutissat aappassaanneerpeqanngillat, tassami suliarinninnissaq 2014-imi ukiaanerani ataatsimiinnissamut kinguartinneqarmat. Qinersinissap nalunaarutigineqarnera pissutigalugu inatsisissatut siunnersuut taamanikkut atorunnaarpoq.

Tamatuma kingorna 2015-imi upernaakkut ataatsimiinnermi, UPA2015/121, atuutsitsilernissamut aalajangersakkat allannguuteqartinneqarnissaat pillugu Inatsisartut aalajangiiffigisassaattut siunnersuut, siunnersuummut 2014-imi Inuussutissarsiornermut Ataatsimiititaliamit siunnersuutigineqartumut assigusoq, saqqummiunneqarpoq. Inatsisartut aalajangiiffigisassaattut siunnersuutip siullermeerneqareernerata kingorna, taanna Aningaasaqarnermut Akileraartarnermullu Ataatsimiititaliamut innersuunneqarpoq. Tamatuma kingorna aalajangiisoqarpoq siunnersuutip aappassaanneerpeqarnissaa 2015-imi Ukiaanerani ataatsimiinnissamut kinguartinneqassasoq.

Qanoq pisoqaraluarpalluunniit isertitat aningaasaateqarfiup ingerlatsinermit aningaasartuutaasa ingerlaavartut matussuserneqarsinnaanissaannik qularnaarisogarani, aatsitassarsiornermi aningaasaateqarfiup aallartinneqarnissaa naleqqutinngitsoq Naalakkersuisut isumaqarmata, 2014-imi upernaakkut ataatsimiinnermit siunnersuut matumuuna saqqummiuteqqinneqarpoq.

2. Siunnersuummi immikkoortut pingaernerit*1) Inatsisit atuuttut*

Suliassaqarfimmi inatsit atuuttoq tassaavoq Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat nr. 6, 5. december 2008-meersoq.

Inatsimmut atuuttumut nassuiaatini allassimavoq, ukiuni ataasiakkaani isertitat apeqqaatinnagit, Kalaallit Nunaata aningaasaqarnerata patajaatsumik piujuartussamillu ineriartortinneqarnissaa siunertaralugu, aatsitassarsiornermut suliaasaqarfimmit isertitat atorneqarsinnaanissaasa qulakkeerneqarnissaa, aningaasaateqarfimmut siunertaasoq. Aammattaaq aningaasaateqarfimmik pilersitsinermit siunertaavoq, aatsitassarsiornermik suliffissuaqarnermit Kalaallit Nunaata isertitaasa atorneqarneranni, aamma siunissami kinguaariit iluaqutissaattut, Kalaallit Nunaata aningaasaqarnerata pingaarnertigut ungasissoq eqqarsaatigalugu atorneqarnissaasa tunngavissinneqarnissaasa qulakkeerneqarnissaa.

Aammattaaq nassuiaatini allassimavoq, ataatsimut isigalugu aningaasarsiat aningaasartuutillu annertussusaat naleqqutinngitsumik qaffallutik, ”hollandimiut ajutoorutaattut” taaneqartartup pitsaaliorneqarnissaa, aningaasaateqarfiup pilersinneqarneranut siunertaasoq.

2012-imi ukiaanerani ataatsimiinnermi immikkoortoq 52-ip suliarineqarneranut atatillugu Inussutissarsiornermut Ataatsimiititaliap isumaliutissiisummini oqaatigaa, aningaasaateqarfik pinngortitap pissarititaannik kinguaariit akornanni naleqquttumik agguaanissamut sakkussaasoq. Ataasiarluni aningaasat aningaasaateqarfimmut nakkartussat annikillineqarlutik aallarereeraanni, tamatuma kingorna aningaasaateqarfimmut akiliutit annikilliseqqinnginnissaannut politikikkut sakkortooujussuarmik aalajangiussanik malitsiniaasoaqartariaqartussaavoq, tassami nukinginnarluinnartumik pisariaqartitsisoqartoq oqartoqartuaannartussaavoq aammalu pisortat aningaasartuutaasa annertusitinnissaannut politikikkut piumassuseqalersitsiniarnertut isikkoqarsinnaasumik inuiaqatigiinni soqutigisaqatigiinnik tamatigut peqartuaannartussaalluni.

Atuutsitsilernissamut piffissap allannguuteqartinneqarnissaanut siunnersuutip matuma saniatigut, aningaasaateqarfiup uninngasuutaasa aningaasartanut killissaliussat erseqqinnerusumik aalajangersagaangitsut inorlugit amerlassuseqarneranni, aningaasaateqarfimmi allaffissornerup pisariillisarneqarnissaa kiisalu aalajangersakkanik aningaasaateqarfimmit aningaasanik tigusinissamut periarfissanik killiliisussanik ilanngussinissaq pillugit siunnersuummik Naalakkersuisut 2016-ip ingerlanerani saqqummiussinissaq naatsorsuutigaat.

2) *Siunnersuut*

Siunnersuut piffissap atuutsitsilerfiusussap allannguuteqartinneqarnissaanik, kiisalu teknikkikkut iluarsiinernik imaqarpoq.

2.1 Piffissap atuutsitsilerfiusussap allannguuteqartinneqarnissaa

2013-imi ukiaanerani ataatsimiinnermi ilaatigut piffissap atuutsitsilerfiusussap allannguuteqartinneqarnissaanut makkua tunngavilersuutitut saqqummiunneqarput (UKA 2013/84):

”2012-mi upernaakkut ataatsimiinnermi Naalackersuisuusimasut aatsitassarsiornermi aningaasaateqarfiup atuutsinneqalertarnissaanut aningaasat 5 millionit 75 millioninut qaffanneqarnissaannik siunnersuuteqarput. Taamanikkut Naalackersuisut inatsimmut siunnersuutaannut Inuussutissarsiornermut Ataatsimiititaliamit allannguutissamik siunnersuuteqartoqarpoq.

Aningaasaateqarfiup ingerlanneqarnissaanut aningaasartuujumaartussat eqqarsaatigalugit Inuussutissarsiornermut Ataatsimiititaliap 5 millionit annikinaagaasimassasut miserratiginngilaa. Taamatuttaaq Inuussutissarsiornermut Ataatsimiititaliap akuersaarpaa aatsitassarsiornermit isertitat aallaqaammut allanngorartuunissaat naatsorsuutigineqartariaqartoq.

Inuussutissarsiornermulli ataatsimiititaliap aningaasat 75 millioninut qaffanneqarnissaannut tunngavissaqanngitsoq nalilerpaa. Tamanna tunngavigalugu Inuussutissarsiornermut ataatsimiititaliap sukumiisumik isumaliutissiissuteqarnermigut (UKA/2012/52), aningaasat 5 millioniniit 10 millioninut qaffanneqarnissaat siunnersuutigivaa, ilanngullugulu siunnersuutigalugu aatsaat aatsitassarsiornermut ataatsimiititaliaq ukiut tulleriissut aappassaanni 10 millionit sinnerlugit isertitaqaraangat tamanna pisassasooq. Qinersisoqannginnerani pisaq naammassineqanngitsoorpoq. Taamaattumik taamanikkut Inuussutissarsiornermut ataatsimiititaliap siunniussaata kissaataatalu naammassineqarnissaat anguniarlugu aalajangiiffigisassatut siunnersuut manna saqqummiuppara.”

Inatsisissatut siunnersuut inatsimmut atuuttumut sanilliullugu	
<i>Oqaasertaliineq atuuttoq</i>	<i>Inatsisissatut siunnersuut</i>
	§ 1
	Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat nr. 6, 5. december 2008-imeersumi makkua allannguuteqartinneqarput:

	<p>1. Inatsisartut inatsisaani tamarmi (qallunaatuani) ”Landsstyret” allanngortinneqassaaq imaalerlugu ”Naalakkersuisut” aamma ”Landsstyrets” imaalerlugu ”Naalakkersuisut”.</p>
	<p>2. Inatsisartut inatsisaanni tamarmi (qallunaatuani) ”Landstinget” allanngortinneqassaaq imaalerlugu ”Inatsisartut” aamma ”Landstingets” imaalerlugu ”Inatsisartut”.</p>
	<p>3. Inatsisartut inatsisaanni tamarmi ”namminersornerusut” allanngortinneqassaaq imaalerlugu ”Namminersorlutik Oqartussat” aamma ”Namminersorerullutik Oqartussat” imaalerlugu ”Namminersorlutik Oqartussat”.</p>
	<p>4. § 6, <i>imm.</i> 6-imi allanngortinneqassaaq ”Namminersorerullutik Oqartussat” imaalillugu ”Namminersorlutik Oqartussat”.</p>
<p><i>Imm.</i> 2. Tamatuma saniatigut aningaasaateqarfiup naatsorsuutai kukkunerisiorneqassapput Namminersornerusut naatsorsuuseriviat assigisaallu pillugu inatsit malillugu.</p>	<p>5. § 36, <i>imm.</i> 2, imatut oqaasertalerneqassaaq: ”<i>Imm.</i> 2. Aningaasaateqarfiup naatsorsuutaannik kukkunerisuineq aammattaq Namminersorlutik Oqartussani naatsorsuutininik saqqummiussisarnermut maleruagassat atuuttut malillugit ingerlanneqartassaaq.”</p>
<p>§ 44. Aningaasaateqarfiup atorunnaarsinneqarnera taamaallaat Inatsisartut inatsisiliornerisigut pisinnaavoq.</p>	<p>6. § 44, <i>imm.</i> 1, imatut oqaasertalerneqassaaq: ”Aningaasaateqarfiup atorunnaarsinneqarnera taamaallaat Inatsisartut inatsisaani aalajangersaanermi pisinnaavoq.”</p>
	<p>7. § 50 imatut oqaasertalerneqassaaq:</p>

<p>§ 50. Inatsisartut inatsisaat atuutilissaaq 1. januar, ukiumi tulliuuttumi Inatsisartut landskarsip naatsorsuutaannik siullermeerluni akuerinninnerannit, tassani ersersinneqassalluni ukiumi naatsorsuuseriffiusumi Namminersornerusut aatsitassanit isertitaat ikinnerpaamik 5 millioner koruuniusimasutut.</p> <p><i>Imm. 2.</i> Imm. 1-imi piumasaqaatit eqquutsinneqareerpata inatsisartut inatsisaata atuutilerfia pillugu Naalakkersuisut nalunaarummik saqqummiussissapput.</p>	<p>” § 50. Ukiumi naatsorsuusiorffiusumi aatsitassarsiornermit isertitat 10 millioner koruuninit amerlanerusut ilaallutik nunap karsiata naatsorsuutaannik ukiut marluk tulleriit Inatsisartut akuersissuteqareernerisa kingorna, ukiup tulliani 1. januar imaluunniit piffissami siusinnerusumi Naalakkersuisut erseqqinnerusumik aalajagigaanni, Inatsisartut inatsisaat atuutilissaaq.</p> <p><i>Imm. 2.</i> Ulloq 1. januar 2016 atuutilersumik aningaasat imm. 1-imi taaneqartut ukiumut 10 millioner koruuniusut, ukiumi pineqartumi aningaasanut inatsimmi akinut aningaasarsianullu iluarsinermut tunngaviusup nalinginnaasup qaffaataanut naapertuuttumik, iluarsineqassapput.</p> <p><i>Imm. 3.</i> Imm. 1-imi piumasaqaatit naammassineqarpata, Inatsisartut inatsisaata atuutilernera pillugu nalunaarummik Naalakkersuisut saqqummiussissapput.”.</p>
	<p style="text-align: center;">§ 2</p> <p>Inatsisartut inatsisaat ulloq 1. december 2015 atuutilerpoq.</p>

3. Pisortanut aningaasaqarnikkut allaffissornikkullu sunniutaasussat

Siunnersuut pisortanut aningaasaqarnikkut imaluunniit allaffissornikkut sunniuteqassasoq naatsorsuutigineqanngilaq. Aningaasaateqarfiup ingerlaavartumik isertitanik tigusaqartarnissaa aalajangersimasumik qularnaaqqartinnagu, aningaasaateqarfiup ingerlatsinermut aningaasartuuteqarluni aallartinneqannginnissaata qulakkeerreqarnissaa, siunnersuummi siunertarineqarpoq.

Pigisat tigussaasut aatsitassarsiornermi aningaasaateqarfimmut tunngatillugu aatsitassarsiornermit isertitatut ilaatillugit naatsorsorneqartassanngitsut pillugu aalajangersagaq, siunnersuutaqqaartumut naleqqiullugu ilaatinneqanngilaq. Taamaattoq pisortat IBA-mut isumaqatiginninniarnernut atatillugu pigisanik tigussaasunik

tigusaqassagalarpata, tamanna Nunap karsianut annertoorujussuarnik sunniteqarnerlussinnaasoq eqqumaffiginissaa suli pingaaruteqarpoq, tassami tamatuma ilaatigut ingerlatseqatigiiffiup akileraaruteqaataasussamik isertai, taamaalillunilu ingerlatseqatigiiffiup akileraarutaa, annikillisittussaavai, taamatullu tamanna tamatuma kingorna naalagaaffiup ataatsimoortumik tapiissutaasa annikillisinneqarnerannik malitseqarsinnaalluni. Taamaattoqassaaq pigisat tigussaasut aningaasaateqarfimmut akiliutigineqartussaannerat taamaanginneraluunniit apeqqutaatinnagu.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut annertuunik aningaasaqarnikkut imaluunniit allaffissornikkut sunniteqassasoq naatsorsuutigineqanngilaq.

5. Avatangiisinut, pinngortitamut aamma inuit peqqissusaannut sunniutaasussat

Siunnersuut avatangiisinut, pinngortitamut imaluunniit inuit peqqissusaannut sunniteqassanngilaq.

6. Innuttaasunut sunniutaasussat

Siunnersuut innuttaasunut aningaasaqarnikkut sunniteqassasoq naatsorsuutigineqanngilaq.

7. Sunniutaasussat annertuut allat

Siunnersuut allanik sunniteqassanngilaq.

8. Oqartussaasunut kattuffinnullu tusarniaaneq

Siunnersuut piffissami 2013-imi 4. decembarimiit 2014-imi 3. januaarimut makkunani tusarniaassutigineqarpoq:

Aningaasaqarnermut Naalakkersuisoqarfik, Naalakkersuisut Siulittaasuata Naalakkersuisoqarfia, Akileraarnermut Aqutsisoqarfik, Kalaallit Nunaata Aningaasaqarneranut Siunnersuisooqatigiit, BankNordik, Grønlandsbanken, SIK, GA, Nusuka, Transparency Greenland, ICC, IMAK, Statsministereqarfik.

Tamatuma saniatigut siunnersuut Namminersorlutik Oqartussat tusarniaanermut nittartagaanni tamanut ammasumik tusarniaassutigineqarpoq.

Makkunangga tusarniaanermut akissuteqaat tiguneqarpoq: Aningaasaqarnermut Nunamullu Namminermut Naalakkersuisoqarfik, Grønlandsbanken, GA, ICC aamma IMAK.

Tusarniaareernerup kingorna pigisat tigussaasut pillugit § 3, imm. 3-ip allannguuteqartinneqarnissaa pillugu siunnersuutaqqaartumi aalajangersakkat siunnersuummit peerneqarput.

Tulliuttuni tusarniaanermut akissuteqaatit, aamma allannguutissatut siunnersuutit, tusarniaanerup nalaani tiguneqartut, sammineqarput. Oqaatigineqassaaq tusarniaanermut akissuteqaatit uingasumik allassimasut, pingaaruteqarnerinik naliliineq tunngavigalugu pingaarnertiguinnaq issuarneqarmata. Tusarniaanermut akissuteqaatit ilai § 3, imm. 3-ip allannguuteqartinneqarnissaanut tunngassuteqartut, matuma kinguliani allaaserinninnermi ilanngunneqanngillat.

Aningaasaqarnermut Nunamullu Namminermut Naalakkersuisoqarfik isumaqarpoq, ukiorpassuarni aningaasaateqarfimmi aningaasaatit pimoorussisumik malunnaatilimmik erniaqarsinnaalernissaat sioqqullugu allaffissornerup pisariillisarneqarnissaanut akikillisarneqarnissaanullu, inatsisip iluarsaanneqarnerani naleqquttumik suliniuteqartoqarsinnaassasoq. Tamanna assersuutigalugu pisinnaavoq aningaasaateqarfiup pigisai 1 mia. koruuninit ikinneruneranni.

UPA2015/120-122-ip siullermeerneqarneranut atatillugu Naalakkersuisut paasissutissiipput, UKA2016-imi inatsimmut matumunnga allannguutissatut siunnersuummik saqqummiussinissaq Naalakkersuisut naatsorsuutigigaat, tassani ilaatigut aningaasaateqarfiup uninngasuutaasa aningaasartanut killissaliussat erseqqinnerusumik aalajangersagaanngitsut inorlugit amerlassuseqarneranni, aningaasaateqarfimmi allaffissornerup pisariillisarneqarnissaa siunertaralugu aalajangersakkanik ilanngussisoqassasoq naatsorsuutigineqarluni.

”GrønlandsBANKEN isumaqarpoq, Aatsitassarsiornermi aningaasaateqarfik pillugu inatsisip Kalaallit Nunaannut atuuttup GØR-imit isornartorsiorneqarnera eqqarsaatigalugu, Aatsitassarsiornermi aningaasaateqarfimmut inatsimmut allannguutissatut siunnersuummit nassiunneqartumit allaanerusumik itisiliinerusumillu Aatsitassarsiornermi aningaasaateqarfimmut inatsisip iluarsaanneqarnissaa iluaqutaasumik aallartinneqarsinnaasoq. Tamanna aamma Inuussutissarsiornermut Ataatsimiititaliap isumaliutissiissutaani immikkoortoq 6-imi aamma inerniliinerani, inerniliissutaavoq.

GØR-ip inassuteqaatai malitseqartillugit, Aatsitassarsiornermi aningaasaateqarfimmut inatsimmi erseqqinnerusumik atuuffissaannut politikkimik ilanngussinissaq naleqqussinnaavoq. Aammattaaq Kalaallit Nunaanni Aatsitassarsiornermi aningaasaateqarfiup aningaasanik atuinissamut atituumik erseqqinngitsumillu nassuiarneqartumik sinaakutissaqartinneqarnera iluaqutaasumik iliuseqarfigineqarsinnaavoq. Aatsitassarsiornermit isertitat atorneqarnissaannut tunngavissarititaasut ersarissuunissaat pisariaqarpoq. Tamatuma aningaasaateqarfiup aningaasaataannik kukkusumik atugassiissuteqartarneq pakkersimaassavaa aammalu

Aatsitassarsiornermi aningaasaateqarfiummi aningaasaatit atorreqartarnerannut ersarissunik eqquisunillu maleruagassaqaqtitsilerluni, ”pingaartumik erniaviusut agguaqatigiissillugu annertussusissaattut naatsorsuutigisat sinnerlugit aningaasanik inissisimasunik atuisarnermut tunngatillugu.” Tamatumunnga nangissutigalugu soorunami royalty-mut aamma akileraarutinut akiliutinut taarsiullugu IBA-mut tunngatillugu suliassat suut akuersaarneqarsinnaanersut tunngavissarititaasunik killissaliussanillu ersarissunik pilersitsisoqartariaqaraluarpoq.”

UPA2015/120-122-ip siullermeerneqarneranut atatillugu Naalakkersuisut paasissutissiippat, UKA2016-imi inatsisip matuma allannguuteqartinneqarnissaanut siunnersuummik saqqummiussinissaq Naalakkersuisut naatsorsuutigigaat, tassani ilaatigut aalajangersakkanik aningaasaateqarfimmit aningaasanik tigusinissamut periarfissanik killilersimaarisussanik ilanngussisoqassasoq naatsorsuutigineqarluni, tassani ilaalluni aningaasaateqarfiup aningaasaatai atorlugit suliniutinik aningaasalersuineri, aningaasaliineri pisortat aningaasaliisarnerannut tunngavissarititaasut qitiusut naammassineqarsimanissaat, qulakkeerneqassasoq. Tassa imaappoq suliniutit inuiaqatigiit aningaasaqarneranni imminut akilersinnaassasut aammalu aningaasaqarnermut politikikkikut attassisinnaanermut iluaqutaassasut.

GrønlandsBANKEN-imit oqaaseqaammi kingullermi pigisat tigussaasut pillugit § 3, imm. 3-
imik allannguuteqartitsinissaq, maannakkut allannguuteqartitsinissamik siunnersuummi ilanngunneqanngitsaq, innersuussutigineqarpoq.

GA-ip oqaatigaa tamanna aningaasaqarnikkut illersorneqarsinnaappat, aningaasaateqarfik sapinngisamik sukkanerpaamik pilersinneqartariaqaraluartoq. Aningaasaateqarfimmi allaffissornermut aningaasartuutinut tunngatillugu aningaasaateqarfiup aningaasaatai erniaalu pillugit isumanerluuteqartoqarpat, piffissamik atuutsitsiartuaarfiusussamik atuutsitsisoqartariaqarpoq, tassani aningaasartuutit taakkua pisariaqartumik annikitsumik annertussuseqartinneqassallutik. GA-ip 10 mio. koruunit aningaasartanut killiliussassatut siunnersuutigai, kisianni ukiumi siullermi taamatut annertussusilinnik isertitaqartoqareernerata kingorna aatsaat aningaasaateqarfik piviusunnigortussaassasoq.

UPA2015/120-122-ip siullermeerneqarneranut atatillugu Naalakkersuisut paasissutissiippat, UKA2016-imi inatsimmut matumunnga allannguutissatut siunnersuummik saqqummiussinissaq Naalakkersuisut naatsorsuutigigaat, tassani ilaatigut aningaasaateqarfiup uninngasuutaasa aningaasartanut killissaliussat erseqqinnerusumik aalajangersagaanngitsut inorlugit amerlassuseqarneranni, aningaasaateqarfimmi allaffissornerup pisariillisarneqarnissaa siunertaralugu aalajangersakkanik ilanngussisoqassasoq naatsorsuutigineqarluni.

”GA isumaqarpoq – Aningaasaqarnermut Siunnersuisooqatigiittuulli – aningaasat sumut atorneqarnissaannut tunngatillugu aningaasaateqarfimmi aalajangersakkat sukaterneqarnissaat pisariaqartinneqartoq.

Sukaterineq taanna inatsisissatut siunnersuut saqqummiunneqarpiartoq apequtaatinnagu pisariaqaraluarpoq.

Naggasiut

Naggasiutigalugu GA-ip kaammattuutigaa, aatsitassarsiornermi aningaasaateqarfik pillugu inatsit suliami ataatsimoortumi ataatsimi iluarsaanneqassasoq. Tassunga atatillugu GA-p sakkortuumik kaammattuutigaa, assersuutigalugu Aningaasaqarnermut Siunnersuisooqatigiit allallu immikkut ilisimasallit akuutinneqassasut.

Inuiaqatigiit aningaasaqarnerannut sunniutaasussat ilanngunneqarnissaat aammalu allatut periarfissani atorneqarsinnaasuni tamani oqaaseqarfigineqarnissaat pingaartumik pisariaqarpoq – aammalu piviusuuvoq, aningaasaateqarfik aatsaat ingerlanneqalereerpat, aningaasaateqarfimmut inatsisitigut tunngaviusut allanngortinneqarnissaat ajornarnerulertussaasoq.”

UPA2015/120-122-ip siullermeerneqarneranut atatillugu Naalakkersuisut paasisutissiipput, UKA2016-imi inatsisip matuma allannguuteqartinneqarnissaanut siunnersuummik saqqummiussinissaq Naalakkersuisut naatsorsuutigigaat, tassani ilaatigut aalajangersakkanik aningaasaateqarfimmit aningaasanik tigusinissamut periarfissanik killilersimaarisussanik ilanngussisoqassasoq naatsorsuutigineqarluni, tassani ilaalluni aningaasaateqarfiup aningaasaatai atorlugit suliniutinik aningaasalersuineri, aningaasaliineri pisortat aningaasaliisarnerannut tunngavissarititaasut qitiusut naammassineqarsimanissaat, qulakkeerneqassasoq. Tassa imaappoq suliniutit inuiaqatigiit aningaasaqarneranni imminut akilersinnaassasut aammalu aningaasaqarnermut politikkikkut attassisinnaanermut iluaqutaassasut.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-4-imut

Aalajangersakkat namminersorneq pillugu inatsisip akuerineqarnerata malitsigisaanik sunniutaasunik allannguuteqartitsinerupput.

Nr. 5-imut (§36, imm. 2)

Aalajangersakkami Inatsisartut inatsisaata kalaallisoortaani kukkuneq iluarsineqarpoq, taamatullu aalajangersakkamut Namminersorlutik Oqartussani naatsorsuutunik saqqummiussisarnermut tunngatillugu inatsisip sukkulluunniit atuuttup taaguutaa apeqqutaatinneqarunnaarluni.

Nr. 6-imut (§ 44, imm. 1)

Aalajangersagaq namminersorneq pillugu inatsisip akuerineqarnerata malitsigisaanik sunni-utaasunik allannguuteqartitsineruvoq.

Nr. 7-imut (§ 50)

Aalajangersakkami aatsitassarsiornermi aningaasaateqarfiup aallartinneqarnissaa kinguartinneqassaaq, taamaalilluni qaammatisiutit malillugit ukiumi ataatsimi annertuunik, kisiannili sivikitsuinnarmik isertitarineqartunik, isertitaqartoqarnera pissutiginnarlugu, taanna aallartinneqassanani. Aningaasaateqarfiup aallartinneqarnissaa sioqqullugu ingerlaavartunik annertuunik isertitaqarnissaq qulakkeerniarlugu aningaasartanut killissaliussat qaffanneqarput, aammalu aatsitassarsiornermi aningaasaateqarfiup siunertaa eqqarsaatigalugu aalajangersarneqarluni.

§ 2-imut

Siunnersuutigineqarpoq Inatsisartut inatsisaat 1. december 2015 atuutilissasoq.